

Diospa munayninta ruwananchikpaq huñunakuypi yanapawaqninchik qillqapa sapaq yachachikuyninkuna

1-7 MARZO

BIBLIAMANTA ASTAWAN YACHANAPAQ | NUMEROS 7, 8

“¿Imatam yachachiwanchik Israel runakuna campamentopi imayna kawsakusqankuqa?”

it-1-S pag. 523 § 7
Iñiqkuna

Israel nacionpiqa llaqtapa rantinpim kamachikuqkuna imatapas ruwaqku (Esd 10:14). Sapa ayllupa jefenkunam Diosman ofrendankuta aparqaku (Nu 7:1-11). Nehemiaspa tiemponpipas llaqtapi punta apaqkuna, Levij casta runakuna chaynataq sacerdotekunam llaqtapa rantinpi sellonkuta churarqaku kasukunankupaq (Ne 9:38–10:27). Moisespa hinaspa Aaronpa contranpim huqarikurqaku Corey, Datan, Abiram hinaspa On sutiyuq ancha riqsisqa runakuna. Paykunawan kuskataqmi huqarikurqaku 250 runakunapas, chay umacharachikuq runakunapas karqaku punta apaqkunam chaynataq ancha riqsisqa runakunam (Nu 16:1-3). Moisesmi Diospa nisqanman hina Israel runakunamanta 70 kamachikuqkunata akllarqa, paykunawan kuskam Moisesqa llaqtamanta cuenta-llikurqaku (Nu 11:16, 17, 24, 25). Levitico 4:15 willawanchik Israel nacionpi punta apaqkunamanta. Chay punta apaqkunaqa llaqtapa rantinpim imatapas tantiaqku chaynataq ruwaqku (Nu 1:4, 16; Jos 23:2; 24:1).

it-2-S pag. 874 § 1
Ruben

Ruben aylluqa Simeonpa hinaspa Gad ayllupa chawpinpim karqaku. Israel runakuna rinanku kaptinmi Ruben, Simeon hinaspa Gad ayllukunaqa Juda, Isacar hinaspa Zabulon ayllukunapa qipanta qatiqku (Nu 2:10-16; 10:14-20). Chayman hinataqmi Diospa carpanta ruwayta

tukuruptinkupas ofrendankuta aparqaku (Nu 7: 1, 2, 10-47).

w04-S 1/8 pag. 25 § 1

Numeros qillqapa yachachikuyninkunamanta

8:25, 26. Yuyaq Levij casta runakunaqa manañam Diospa carpanpiqa imam ruwanankutaqa ruwarqakuñachu. Chaywanpas Levij ayllumasinkutam imachapipas yanapakunmankuraq karqa. Levij ayllu hayka watankukama yanapakunankupaq Diospa nisqanmantaqa ñuqanchikpas yachachwanmi. Yuyaq ñiqmasinchikkuna ñawpaqpi hina mana ruwayta atispankupas imachapipas yanapakuytam atinmanku.

Ima yachachikuynatam tariramunchik

it-2-S pag. 717 § 3

Piwi churikunamanta

Israel runakunapa piwi churinkuqa ayllunkupa punta apaqninkum karqa. Jehova Diosqa lliw Israel runakunatam ‘piwi churinta hina qawarqa’, chaynataqa qawarqa Abrahamwan contractota ruwasqanraykum (Ex 4:22). Egipto nacionpi Israel runakunapa piwi churinkunata Jehova Dios mana wañuchisqanraykum payllapaqña sapaqcharqa, payllapaqñataqmi sapaqcharqa animalkunapa punta wawantapas (Ex 13:2). Arí, chaynapimá imapas punta naceqqa Jehova Diospaq sapaqchasqa karqa.

8-14 MARZO

BIBLIAMANTA ASTAWAN YACHANAPAQ | NUMEROS 9, 10

“¿Imaynatam Jehova Diosqa llaqtanta pusachkan?”

it-1-S pag. 403 § 6

Campamento

Israel runakunaqa manam chaqwanpichu

maymanpas astakuqkuqa. Diosman asuykuna carpapa hawanpi hinalla puyu kaptinqa Israel runakunapas hinallapim kaqku, chay puyu huqarikuptinñataqmi paykunapas llusiqku. 'Tayta Dios kamachiptinmi Israel runakunaqa llusiqkupas utaq samaruqkupas' (Nu 9:15-23). Iskay cornetillatam waqachiqku llusqinankupaq, chay cornetillapa waqasqanta uyarisqankuqa llusqinankupaq Jehova Diospa nisqanmi karqa (Nu 10:2, 5, 6). Diospa baulnintam puntata apaqku, chaymantam qatiqku Juda, Isacar hinaspa Zabulon ayllu. Chaymantañataqmi riqku Gersonpa miraynin hinaspa Meraripa miraynin Diospa carpanpa tukuy imachankunatapas apastin. Paykunapa qipantañataqmi riqku Ruben, Simeon hinaspa Gad ayllu. Paykunapa qipantañataqmi Coatpa mirayninkuna Diospaq sapaqchasqa kaqkunata apastin riqku. Paykunapa qipantañataqmi Efrain, Manases hinaspa Benjamin ayllu riqku. Paykunapa qipantañataqmi Dan, Aser hinaspa Neftaliy ayllu riqku. Chaynatam Israelpa llapa mirayninqa sapa kuti llusqiraku (Nu 10:11-28).

w11 15/4 pag. 4 § 4, 5

¿Yachanchikchu imaynatam Dios pusawasqanchikta?

¿Imaynatam agradecekuchwan Dios pusawasqanchikmanta? Pablom niwanchik: "Pusasuqnikichik runakunata kasukuspaya paykunaman sujetakuychik", nispa (Heb. 13:17). Chay ruwayqa manamá facilchu. Piensariy Moisespa tiempopi huk kaqnin Israel runa kasqaykita. Achka punchawkunaña sayanpa puyuta qatichkawaq. Qunqaymantañataqmi puyu sayarunman. Hinaspam piensanki: "¿Haykapikamaya kaypi sayanqa?, ¿huk punchawllachu, huk semanachu icha achka killakunachu?", nispa. Hinaptinqa tapukunkichá, ¿imaykunatapas hurqusaqchu?, nispa. Iskayrayaspaykim necesitasqallaykita hurquyta qallarinki. Ichaqa achka punchawkuna pasaruqptinmi imaykikunatapas hurqupa-

yasqaykimanta amiruspa llapan imaykikunata hurquruwaq. Hinaptinmi chaylla sayanpa puyuca pasakuyta qallaykunman, qamñataq tukuy imaykikunata allichayta qallaykuwaq. ¡Hukmanyanaq hinamá! Ichaqa mana munaspapas wakinkuna hinam chaylla qatinayki (Num. 9:17-22).

¿Imaynatam Diospa pusawasqanchikta kunan qawanchik? ¿Chayllachu kasukunchik icha ñawpaqpi hinachu imatapas ruwanchik? ¿Kasukunchikchu runamasinchikkunaman imaynata yachachinapaq niwaptinchik, huk law nacionniyuqkunaman willakunapaq niwaptinchik, aylunchikwan Diosta imayna yupaychanapaq niwaptinchik? ¿Kasukunchiktaqchu hatun huñunakuykunapi imayna kanapaq niwasqanchikta chaynataq Comités de Enlace con los Hospitales nisqata imayna yanapanapaq? Agradecekuchwantaqmi Diospa pusawasqanchikmanta lliw niwasqanchikkunata kasukuspa. Chaymi imatapas tantiaspaqa, manam piensasqanchikman hinachu ruwanchik, aswanqa Diospa hinaspa llaqtanpa yanapakuynintam maskanchik. Manchakuypaq imapas hamuptinqa wamachakunaqa tayta-mamanmanmi kallpanku, chaynam ñuqanchikpas sasachakuykuna kaptin iñiqmasinchikkunapa yanapakuyninta maskananchik.

Ima yachachikuykunatam tariramunchik

it-1-S pag. 226 § 4

Hatun huñunakuykuna

Huñunakuyninchikkuna imanasqa ancha allin kasqanmanta. Huñunakuyninchikkunaman riy ancha allin kasqantam yachachwan pascua fiesta ruwasqankumanta yachaspanchik. Pascua fiestata ruwananpaq hina kachkaspan utaq mana illaruchkaspan pascua fiestata mana ruwaqqa wañuchisqam kanan karqa. Wañunanqa karqa llullanta mana ruwasqanraykum (Nu 9:9-14). Kamachiq Ezequiaspas Juda

runakunata chaynataq Israel runakunatam Jerusalemman qayachirqa pascua fiestata ruwanankupaq, kaynatam nirqa: 'Israelpa mirayninkuna, qamkunaqa kutirikuychikyá tayta Diosman [...]. Amayá abueloykichikkuna hinaqa sunquykichikta rumiyachiychikchu. Tayta Diospa kamachikuyninkunatayá kasukuychik, hinaspayá hamuychiktaq paypa wiñaypaq sapaqchasqan santuarionmanpas. Yupaychasqanchik tayta Diosta serviptikichikqa paypa piñakuyninmi qamkunamanta asuringa [...]. Yupaychasqanchik tayta Diosqa llakipayakuqmi hinaspa kuyapayakuqmi, payman kutirikuptikichikqa payqa manam saqisunkichikchu', nispa (2Cr 30:6-9). Pascua fiestata mana ruwaq Israel runaqa Jehova Diostam qipanachkarqa. Ñuqanchikqa manañamá pascua fiestataqa ruwanchikchu, ichaqa apostol Pablom kallpanchawarqanchik huñunakuymán riyta mana saqinapaq. Paymi nirqa: 'Chaynaqa, sunqumanta kuyanakupayá llapallanchik kallpanchanakusun kuyakuq hinaspa allin ruwaq kananchikpaq. Wakinkunapa costumbrasqanman hinaqa amayá huñunakuymán riytaqa saqisunchu, aswanqa Diospa punchawnin chaylla chayamunanta yachaspayá llapallanchik astawan kallpanchanakusunchik', nispa (Heb 10:24, 25; qaway CONGREGACIÓN).

15-21 MARZO

BIBLIAMANTA ASTAWAN YACHANAPAQ | NUMEROS 11, 12

“¿Imanasqataq mana rimapakunanchikchu?”

w01-S 15/6 pag. 17 § 20

Ñawpaqpi pasakusqanmanta yachasunchik

²⁰ Jehova Diosta serviqkunaqa wakillankum huchapakuyman wichinku. Chayna kaptinpas llapallanchikmi qawarikunanchik mana rimapakuy kanapaq. Rimapakuy kaptinchikqa Diosmi

qipancharuwasun. Apostol Pablom niwanchik: “Amataqyá wakinnin hinaqa Jehova Diostapas pruebaman churasunchu, chaymi culebrapa kachusqan wañurqaku. Amataqyá wakinkuna hinaqa hukkunamanta rimapakuqchu kasunchik, wakinkunam chayna karqaku chayraykum paykunataqa angel wañurachirqa”, nispa (1 Corintios 10:9, 10). Israel runakunam Moisespa, Aaronpa chaynataq Diospa contranpi rimarqaku. Rimarqakuqa “maná” sutiuyuk mikuyta manaña mikuyta munasqankuraykum (Numeros 16:41; 21:5). Chay rimapakuq Israel runakunatam Jehova Diosqa culebrawan kachurachispan wañurachirqa. Jehova Diosqa paypa contranpi rimaytaqa huchapakuyta hinam qawan (Numeros 21:6). Chaymanta puntatapas, 14.700 Israel runakunatam Jehova Diosqa wañurachirqa paypa contranpi rimasqankurayku (Numeros 16:49). Chaynaqa, amayá rimapakusunchu Diospa imapas quwasqanchikmantaqa, mana chayqa Diosninchikmi ñuqanchikpaq piñakunman.

w06-S 15/7 pag. 15 § 7

Ama rimapakuspayá imatapas ruwasun

⁷ Egipto nacionmanta Dios libraruptin hinaspa puka lamar quchata Dios chimparachiptinmi Israel runakunaqa Diospaq takirqaku agradecekusqankurayku (Exodo 15:1-21). Chunniqupi kaspankum ichaqa, agradecekuq kanankumantaqa tukuymanta rimapakurqaku. Rimarqakum Diosqa ñakarinkupaq Egiptomanta hurqusqanta, manamá Jehova Diostaqa agradecekurqakuchu tukuy ima qusqanmantaqa. Chaymi Jehova Dios nirqa: “¿Haykapikamataq uyarisaq Israelpa mirayninkunapa rimayninta? Contraypi mana allinkuna rimasqankutam uyarichkani”, nispa (Numeros 14:27; 21:5).

it-2-S pag. 855 § 2

Piñanakuy

Rimapakuy. Egipto nacionmanta llusqira-

musqanku qipatam Israel runakunaqa Jehova Diospa contranpi rimarqaku. Rimarqakum Moises hinaspa Aaron punta apaqninku kasqankumanta (Ex 16:2, 7). Chayna rimasqankuraykum Moisespas wañukuytaña munarqa (Nu 11:13-15). Pipas rimapakuqllaña kaqqa wañuymanpas chayanmanmi. Moisespa contranpi rimaqkunatam Jehova Diosqa qawarqa paypa contranpi pas rimasqankuta hina (Nu 14:26-30). Achkallay-achka Israel runakunam Diospa contranpi rimasqankurayku wañururqaku.

Ima yachachikuykunatam tariramunchik

it-2-S pag. 288

Maná

“Maná” sutiyuq mikuy imayna kasqanmanta.

Maná sutiyuq mikuyqa rikchakurqa ‘culantro pa mugunmanmi’, colorninñataqmi rikchakurqa belio sutiyuq sachapa wiqinman. Gustonñataqmi karqa “mielniyuq galleta hina” utaq ‘aceitewan ruwasqa tanta hina’. Maná sutiyuq mikuytaqa maraypi utaq muchkapi kutaruspankum yanuqku mankapi utaqmi tortata ruwaqku (Ex 16:23, 31; Nu 11:7, 8).

22-28 MARZO

**BIBLIAMANTA ASTAWAN YACHANAPAQ |
NUMEROS 13, 14**

“Diospi hapipakuspaqa manam manchakusunchu”

w06-S 1/10 pag. 17 § 5, 6

Jehova Diospi hapipakuspaqa manam manchakusunchu.

⁵ Diospa prometesqan allpata watiqamuq Josueywan Calebqa chay allpamanmi yaykuytaña munarqaku, chaymi nirqaku: ‘Chay allpapi runakunataqa amayá manchakusunchu. Paykunataqa tantata mikuchkaq hinam facillata vencerusunchik. Paykunataqa manam pi-

pas yanapanchu. Ñuqanchikwanmi ichaqa tayta Diospuni kachkan’, nispa (Numeros 14:9). ¿Imanasqataq paykunaqa mana manchakurqakuchu? Paykunaqa qawarqakum Egipto nacionniyuq runakunata chaynataq taytacha-mamachankutapas Jehova Diosqa ñakarichisqanta. Qawarqakutaqmi Jehova Diosqa Egipto nacionta kamachiqta chaynataq soldadonkunatapas puka lamar quchapi wañuchisqanta (Salmo 136:15). Chaytaqa paykunawan kуска allpata watiqamuqkunapas qawarqakum, chaymi mana manchakunankuchu karqa. Chayraykum Jehova Dios nirqa: ‘¿Haykapikamataq kay runakuna piñachiwanqa? ¿Haykapikamataq mana creewanqakuchu paykunapa qayllanpi tukuy señalkunata ruwachkaptiyas?’, nispa (Numeros 14:11).

⁶ Israel runakunatam Jehova Dios nirqa pisi iñinyuq kasqankurayku manchakusqankumanta. Arí, pisi iñinyuq kaspapa imatapas manchakuchwanmi. Chaymi apostol Juanpas nirqa allin iñinyuq kaspapa Diosta mana yupaychaq runakuna hina mana kanamanta (1 Juan 5:4). Kay tiempopipas, Josuey hinaspa Caleb hinam Jehova Diosta serviqkunaqa kanku. Chaymi musu kaspapas, yuyaq kaspapas atinchik hinalla Diosmanta willakuyta. Manamá pipas Diosmanta willakuyninchiktaqa harkakuyta atinchu (Romanos 8:31).

Ima yachachikuykunatam tariramunchik

it-1-S pag. 740

Israel runakunaman Diospa qusqan allpa imayna kasqan

Israel runakunaman Diospa qusqan allpaqa allin allpam karqa. Chay allpaman watiqaqkunata Moises kachaptinmi paykunaqa kutimurqaku higosta, granadasta chaynataq uvasta apamuspa. Chay uvastaqa iskay runakunam kallmantinta kaspipi hombrokuykuspa apamurqaku. Watiqamuqkuna chay allpapi yachaq ru-

nakunata manchakuspankupas willakurqakum chay allpaqa ‘tukuy imapapas kanan allpa kasqanta’ (Nu 13:23, 27).

29 MARZO–4 ABRIL

BIBLIAMANTA ASTAWAN YACHANAPAQ | NUMEROS 15, 16

“Amayá hatun tukusunchu nitaq kikillanchikpiqa hapipakusunchu”

w11 15/9 pag. 27 § 12

¿Riqsiwanchu Jehova Dios?

¹² Ichaqa prometesqa allpaman risqankupim, Coreyqa manaña allinpaqñachu qawarqa Diospa llaqtan imayna pusasqa kasqanta. Chaymi 250 riqsisqa Israel runakunawan munarqa tantiasqankuna ruwakunanpaq. Yaqapaschá piensarqaku Diospa chaskisqan kasqankuta, chayraykum Moisespa contranpi huqarikurqaku. Moiestawan wawqin Aarontam nirqa: “¡Chaynallañayá qamkunapa munaychakuynikichikqa kachun! Llapallan kay runakunapas Diospa sapaqchasqanmi kachkan, chaynataqmi paykunawantaq tayta Diospas kachkan”, nispa (Num. 16:1-3). ¡Hatunchakuq kasqankutamá qawachichkarqaku! Piñakurunanmantaga Moiesmi nirqa: ‘Diosmi qawachiwanchik [...] pim paypaq sapaqchasqa kasqanta’, nispa (**qaway Numeros 16:5**). Paqarinnintam Coreywan yanapaqninkuna wañuchisqa karqaku (Num. 16:31-35).

w11 15/9 pag. 27 § 11

¿Riqsiwanchu Jehova Dios?

¹⁴ Moiestawan Coreytaqa manam chaynallatachu Jehova Diosqa qawarqa. ¿Imanasqa? Paykunaqa manam chaynallatachu qawarqaku Diospa kamachisqankunataqa. Coreyqa Leviy kastamantam karqa, Coat ayllumanta. Payqa qawarqam puka lamar quchamanta Dios llaqtanta salvasqanta, allinpaqmi qawarqa Sinai

urqupi mana kasukuqkunata Dios wañuchisqanta hinaspa yanaparqataqmi Diospa baulnin apasqa kananpaqpas (Ex. 32:26-29; Num. 3:30, 31). Yaqachusmi unay wata Diosman sunqu karqa, chayraykum achka Israel runakuna respetarqaku.

Ima yachachikuykunatam tariramunchik

w98-S 1/9 pag. 20 § 1, 2

Aswan allin kaqkunata puntapi churasun

Samana punchawta mana respetaq runata wañuchinankupaqmi Jehova Dios nirqa. Moiestam nirqa: “Chay runaqa wañunqapunim”, nispa (Numeros 15:35). ¿Imanasqataq wañuchinankupaq nirqa?

Israel runakunapaqqa suqta punchawmi karqa kikinkupaq tukuy imata ruwanankupaq. Chay punchawkunam mikunankupaq llamkakunanku karqa, chaynataq yantatapas huñunanku karqa. Qanchis kaq punchawñataqmi Diosllapaq sapaqchasqa karqa. Chay punchawmi Diosmanta yachananku karqa. Yanta huñuyqa manam huchachu karqa, ichaqa Diosta yupaychananku punchawraq yanta huñuyqa manam allinchu karqa. Ñuqanchikqa manañamá qanchis punchawpi samanapaqqa kamachisqañachu kanchik, chayna kaptinpas kayqa yachachiwanchikmi aswan allin kaqkunata puntapi churanapaq (Filipenses 1:10).

5-11 ABRIL

BIBLIAMANTA ASTAWAN YACHANAPAQ | NUMEROS 17-19

“Ñuqam kasaq [...] herenciayki”

w11 15/9 pag. 13 § 9

¿Jehova Diosqa herencianchikchu?

⁹ Kaqmanta rimasun Leviy castakunamanta. Paykunaqa manam ima allpatapas herencia-ta hinaqa chaskirqakuchu. Chaywanpas Diospa

santuarionpi servisqankuraykum Jehova Diosqa kaynata nirqa: ‘Ñuqam kasaq tocanciyki chaynataq herenciaykipas’, nispa (Num. 18:20). Ñuqanchikqa manamá Diospa santuarionpichu servinchik, chayna kaptinpas allinmi kanman Levij kastakuna hina Jehova Dios imapipas yanapawananchikta suyayqa. Chayna ñiyniyuq kayqa ancha allinmi tukupay punchawkunapi kasqanchikrayku (Apo. 13:17).

w11 15/9 pag. 8 § 4

Jehova Diosmi herencianchikqa

⁴ Qawasqanchikman hinaqa, Levij kasta runakunaqa manam allpataqa chaskirqakuchu, aswanmi “herenciankupaq” chaskirqaku “Diospaq sacerdoten” kanankupaq (Jos. 18:7). Chaymi paykunata Diosqa nirqa: ‘Ñuqam kasaq tocanciyki’, nispa (Num. 18:20). Hinaptinqa, ¿yaqachu wakchayaypi kananku karqa mana allpayuq kasqankurayku? Manamá (**qaway Numeros 18: 19, 21, 24**). Diospa ‘carpanpi servisqankuraykum’, Israelpi lliw ayllukunaqa cosechasqankumantawan animalninkunamanta diezmotaqunanku karqa. Levij kasta runakunapas chaskisqankumantam sacerdotekunapaq diezmotaqunanku karqa (Num. 18:25-29). Sacerdotekunaqa chaskirqakutaqmi Israel runakunapa ‘Diospaq sapaqchasqanku ofrendakunata’. Chaynaqa, sacerdotekunaqa manamá iskayrayanmankuchu karqa ima necesitasqankutapas Dios qunanmanta.

Ima yachachikuykunatam tariramunchik

w09 15/8 pag. 22 § 19

Diospa kuyakuyinpiyá takyasunchik

Jehova Diosta servisqunaqa tukuy imapim limpio kananchik. Jehova Diosmi Israel runakunata yachachirqa limpio kayqa ancha allin kasqanta (Lev. 15:31). Moisesman qusqan kamachikuykim nirqa: Imapas mana servisqunata wischunankupaq, servicionkuta mayllanankupaq, makinkutawan chakinkuta mayllakunankupaq chaynataq

pachankuta taqsakunankupaqpas (Exo. 30:17-21; Lev. 11:32; Num. 19:17-20; Deu. 23:13, 14). Diospa kamachikuy qusqanmi Israel runakunata yuyarichirqa Jehova Diosninku limpio hinaspachuya kasqanta. Chaymi ñuqanchikpas, chuya Diosta servisqunaqa limpio kananchik (**qaway Levitico 11:44, 45**).

12-18 ABRIL

BIBLIAMANTA ASTAWAN YACHANAPAQ | NUMEROS 20, 21

“Hukkuna piñachiwaptinchikpas hawkallayá kasun”

w19.02 pag. 12 § 19

Llampu sunqu kaspayá Dioswan kuyachikusun

¹⁹ Chayta ruwaspaqa manam anchatachu pantasun. Moisesqa achka watakunam llampu sunqu karqa, hinaspapas ruwasqanwanmi Diosta kusichirqa. Ichaqa chunniqpi yaqa 40 wataña kachkaptinkum, Moisesqa mana llampu sunquyuq kasqanta qawachirqa. Panin Miriamta Cades lawpi pampasqanmanta qipallatam Israel runakunaqa kaqmanta rimapakuyta qallaykurqaku. Bibliaqa ninmi mana yaku kasqanrayku ‘Moisespa contranpi rimasqankuta’. Moisesnintakama Jehova Dios achka milagrokuna ruwasqanta qawachkaspankupas, hinaspachka wataña Moises paykunata yanapachkaptinpas, hinallam rimapakuchkarqaku. Mana yaku kasqanrayku paypas huchayuq kanman hinam mana allinta rimarqaku (Num. 20:1-5, 9-11).

w19.02 pag. 13 § 20, 21

Llampu sunqu kaspayá Dioswan kuyachikusun

²⁰ Chaykunawan piñarikuspanmi Moisesqa manaña llampu sunquchu karqa. Jehova Diosqa nirqa yaku llusqinapaq qaqata rimapayanapaqmi. Moisesñataqmi piñarikuspan Israel runakunata nirqa qaqamanta yakuta hurqunapaq. Tawanwan iskay kutikama qaqata waqtaruptinmi qaqamanta yaku pawayta qa-

llaykamurqa. Hatun tukuspa piñarikusqanwanmi mana allin ruwayman chayarurqa (Sal. 106: 32, 33). Llambu sunqu kayninta Moises chay kutipi qunqaykurusqanraykum Jehova Diosqa suyasqanku allpaman manaña yaykunanpaq nirqa (Num. 20:12).

²¹ Moiesta pasasqanmanta, ¿imatam yachachwan? Llambu sunqu kanapaqqa hinallam kallpanchakunanchik. Manachayqa qunqayllamantam hatun tukuqña rikuriruchwan, hinaspa rimayninchikpi utaq ruwayninchikpipas muspaypi hinaña ruwayta qallaykuchwan. Chaymantapas sasachakuyqa hukmanyarachiwachwanmi, chaymi anchata kallpanchakunanchik sasachakuypi tarikuspapas llambu sunquqlla kanapaq.

w09 1/10 pag. 31 § 5

Diosqa justicianman hinam imatapas ruwan

Diosqa manamá Moiestaqa kamachirqachu Israel runakunata imatapas ninanpaqqa, manam ninanpaschu karqa mana kasukuqkuna nispaqa. Manataqmi Moiseswan Aaronqa Diostaqa hatuncharqakuchu. Chaymi Diosqa castigarurqa (12 versiculo). ‘Yakuta pawarachimuymanku’ nispanqa Moisesqa nichkarqam, paykuna yakuta hurqunankumanta. Chaymantapas, Diospa chayna castigasqanqa tuparqam wakin chayna castigasqanwan. Yuyarisuntaq, ñawpaqpipas Canaan llaqtaman mana yaykunanpupaqmi wakinkuta castigarqa (Numeros 14: 22, 23). Chaynataq punta apaqkuna kasqankuraykum, Diosqa paykunamanta suyarqa aswan allinta ruwanankuta (Lucas 12:48).

Ima yachachikuykunatam tariramunchik

w14 15/6 pag. 26 § 12

Hukmanyasqakunata Jehova Dios hina qawasun

¹² Chay mana allin ruwasqankunamantam Jehova Diosqa Aaronta chaylla castigarunman karqa. Ichaqa, Jehova Diosqa yacharqam Aaron pantaq runa kaspanpas allin sunquyuq kasqan-

ta. Yaqachusmi Aaronqa hukkunapa intusqan kasqanrayku chay mana allinkunata ruwarurqa. Chayna kaptinpas, Aaronqa chayllam riqsikurqa pantasqankunamanta hinaspa Diospa tukuy tantiasqanta hawka kasukurqa (Ex. 32:26; Num. 12:11; 20:23-27). Jehova Diosqa Aaronpa iñiyinpi hinaspa wanakusqanpim astawan repararqa. Pachaknintin watakuna pasaruptinpas, Aaronwan mirayninkunaqa Diosta kasukuq runakuna kasqankuwanmi yuyarisqa karqaku (Sal. 115:10-12; 135:19, 20).

19-25 ABRIL

BIBLIAMANTA ASTAWAN YACHANAPAQ | NUMEROS 22-24

“Diospa llaqtantam ñakayta munarqaku, ichaqa Jehova Diosmi bendicionman tikrarurqa”

bt-S pag. 53 § 5

‘Jesusmanta sumaq willakuytam willarqa’

⁵ Kunan tiempopas, ñawpaqpi hinam Diosmanta willakuyinchiktaqa mana harkakuyta atinkuchu. Chiqniwaqinchikkunam carcelkunaman utaq huk law llaqtakunamanpas apawanchik manaña willakunanchikpaq. Ichaqa, chaypipas hinallam Diosmanta willakunchik. Iskay kaq hatun guerra kaptinmi Alemania nacionpi iñiqmasinchikkunata carcelman aparurqaku. Chaypipas paykunaqa mana manchakuspankum hinalla Diosmanta willakurqaku. Chay carcelpi kaspas Jehova Diosninchikta riqsiq huk iñiqmasinchikmi nin: “Ñuqawan kaq testigokunaqa hawkallam kaqku. Chayna hawkallaqa kaqku bibliapa nisqankunamanta mana iskayrayasqankuraykum. Chayta qawaspaymi ñuqapas testigo kanaypaq kallpanchakurqani”, nispa.

it-2-S pag. 250

Locoyay

Jehova Diospa contranpi hatariyqa yanqam. Balaam sutiyuq runam Moab nacionta kamachiq

Balacmanta qullqita chaskikuyta munasqanrayku Israel runakunata ñakayta munarqa. Jehova Diosqa manam saqirqachu chayta ruwanantaqa. Balaanmantam apostol Pedro kaynata nirqa: “Huk asnom mana rimaq kachkaspanpas runa hina rimariruspan Balaam runapa loco hina ruwananta harkarurqa”, nispa (2Pe 2:15, 16; Nu 22:26-31).

Ima yachachikuykunatam tariramunchik

w04-S 1/8 pag. 27 § 2

Numeros qillqapa yachachikuyninkunamanta

22:20-22. ¿Imanasqataq Jehova Diosqa Balaam sutiyuq runawan piñakururqa? Jehova Diosmi Balaam sutiyuq runata nirqa Israel runakunata ama ñacaq rinanpaq (Numeros 22:12). Ichaqa Balaam sutiyuq runaqa qullqita chaskikuyta munasqanrayku chaynataq Moab nacionta kamachiq runata kusichiyta munasqanraykum Diospa nisqantaqa mana kasukurqachu (2 Pedro 2:15, 16; Judas 11). Mana munastinmi Israel runakunata bendecirqa. Kamachiqpa allin qawasqan kayta munasqanraykum kamachiqta nirqa baal taytacha yupaychaq warmikuna Israel runakunapa kasqanman rispa sumaq rimaykunallawan huchapakuyman wichichinankupaq (Numeros 31:15, 16). Qullqita chaskikuyta munaspan mana kasukusqanraykum Jehova Diosqa Balaanwan piñakururqa.

26 ABRIL–2 MAYO

**BIBLIAMANTA ASTAWAN YACHANAPAQ |
NUMEROS 25, 26**

“Huk runallapapas Diosman sunqu kasqanqa yanapawachwanmi”

lvs pag. 118 § 1, 2

¡Amayá huchapakusunchu!

KAYPI yuyaymanay: Pipas challwa hapiqqa yachanmi maypi achka challwakuna kasqanta. Hinaspan anzueloman ima uruchatapapas hi-

naykuspan yakuman wischuykun. Payqa pacienciawanmi suyan anzuelopi uruchata challwa kachuramunanta, kachuruptinmi kallpawan chutaspan challwata yakumanta hurqun.

² Runakunapas wichiychwanmi ima tuqllamanpas. ¿Imaynata? Chaymanta yachanapaqyá yuyarisunchik Israel runakunata ima pasasqanmanta. Manaraq prometesqa allpaman yaykuchkaptinkum Moab law pampakunapi samarqaku. Moab nacionta kamachiq runam Balaam sutiyuq runata nirqa Israel runakunata ñakaykuptin achka qullqita qunanmanta. Hinaptinmi Balaamqa tantiarurqa Israel runakunata huchallichinanpaq, chaynapi Jehova Dios paykunata manaña yanapananpaq. Chaymi achka sipaskunata kamachirqa Israel runakunapa kasqanman rispanku qarikunawan huchapakunankupaq (Numeros 22:1-7; 31:15, 16; Apocalipsis 2:14).

lvs pag. 119 § 4

¡Amayá huchapakusunchu!

⁴ ¿Imanasqam achka Israel runakunaqa huchapakururqaku? Kikillankupaq munaq kasqankuraykum hinaspa aychanku kusichiyta munasqankuraykum. Qunqarurqakutaqmi Jehova Dios paykunapaq tukuy ima ruwasqantapas. Diosqa paykunatam Egipto nacionpi sirvientete kasqankumanta hurqumurqa, chunniqipipas mikuchirqam, prometesqa allpapa hichpankamataqmi hawkallata hinaspa sumaqlata pusarqa (Hebreos 3:12). Tukuy chaykunaraykum paykunaqa Diosman sunqu kananku karqa. Ichaqa huchapakururqakum. Chaymi apostol Pablo nirqa: ‘Amayá wakinkunapa huchapakusqankuman hinaqa huchapakusunchu’, nispa (1 Corintios 10:8).

Ima yachachikuykunatam tariramunchik

it-2-S pag. 238 § 1, 2

Lindero

Israel runakunaqa allpataqa rakinakurqaku

suerteaspam chaynataq hayka kasqankuman hinam. Suertearqakum maypi tupananta yachanankupaq. Suerteaptinku maypi tupasqanqa Jehova Diosmantam hamuq, chaymi mana piñanakurqakuchu (Pr 16:33). Chaynapimá Diosqa tupachirqa manaraq wañukuchkaspan Jacobpa willakusqanwan. Jacobmi willakurqa churinkuna imayna kanankumanta, chaytam tarinchik Genesis 49:1-33.

Maypi tupasqanta yacharuspankuqa tantiaq-kutaqmi allpanku mayna hatun kananmanta, chaypaqqa sapa ayllu hayka kasqankutam qawaqku. Diosmi nirqa: 'Kastaykichikman hinam sorteaspa herencia allpata chaskinkichik, achka kaqkunamanqa hatun herenciatam qunkichik, aslla kaqkunamanñataqmi qunkichik tak-sallata. Suerte tupasqanman hinam sapakama may law sitiopipas chaskinkichik', nispa (Nu 33:54). Arí, allpa tupasqankuqa hatunpas utaq taksapas karqa hayka kasqankuman hinam. Chayraykum Juda ayllupa allpantaqa Si-meon aylluman partirqaku Juda ayllupaq ancha hatun kasqanrayku (Jos 19:9).